

## EXEGESIS.

**N**otandum 1. Quod alii quinque gradus torturæ faciunt. Et (1) ponunt minas de torquendo (2) deductionem ad locum tormentorum. (3) Spoliationem seu denudationem & ligaturam. (4) Elevationem (5) quassationem, quando reus, dum elevatus pendet, per carnificem movetur. Clarus *quest. 64. num. 31. Steph. ad h.l. Bocerus c. 5. num. 23. de Tort. p. 464.* Verum accuratè loquendo, minæ de torquendo, deductio ad locum tormentorum, & denudatio non sunt propriè gradus torturæ, quia nullum cruciatum inferunt corpori, etiamsi metum & terrorem torquendi inquisito incutiant. Nihilominus quoad effectum cum tortura æquiparantur, quod paria sint, vel per ipsa tormenta, vel metu tormentorum confiteri, *l. 2. C. Quar. appell. non recip. Carpzov. qu. 117. num. 44. p. 157.*

Alii faciunt tres gradus torturæ 1. est territio, quæ comprehendit sub se minas de torquendo, deductionem ad locum tormentorum, devestiationem & ligaturam. 2. Sublevatio in tormenta, & quæstio sub tormentis. 3. Tortura ipsa, quando nimirum carnifex reum quassat, & semel atq; iterum funi, ex quo inquisitus pendet, acriter impingit ictum, quæ torturæ pars videtur asperrima. *Ægid. Boss. in Tit. de Tort. num. 16. Bocerus c. 5. num. 23. p. 464. de Quest. Jacob. Novell. in Tract. Theor. causar. Crim. p. 110.* Adde & Theodoric. Sed Bocer. negat *d.l.* primum gradum torturæ verum esse gradum, quia cruciatum non infligit corpori, *l. 15. §. 41. ff. de Injur.*

Regulariter tamen duæ species torturæ ponuntur. 1. Territio & 2. Tortura ipsa. *Territionem* quod attinet, illa iterum duplex est. (1) *Verbalis*, quæ est conjuncta cum præparatoriis, & exhibitione instrumentorum, quæ ad torturam faciunt. Estque nihil aliud, quam nuda simulatio carnificis de torquendo reo, absque omni tactu & apprehensione. Et hæc propriè species torturæ non est. *Carpz. quest. 117. num. 49. p. 157.* Interim tamen territio hæc sæpe decernitur, & sæpe etiam eâ mediante extorquetur veritas.

(2) *Realis*, quando præter minas carnifex manum admovet inquisito, & rei corpus levissimis affligit tormentis, dum non tantum denudatur vestibus, ad scalam deducitur, & instrumenta in conspectu ponuntur; Verum etiam pollices comprimuntur forcibus, Wann die Daumen stöße angeleget werden: vel funiculis ligari incipit reum, mit dem Schnur

Schnur